



PERSEVERA

Un página di kurashámentu i guia spiritual pa miembronan di Scouting Antiano



Novèmber 2012

Edishon 22 Aña 2

Bo Ta Seif ?



Nos ke sinti nos seif. Nos ke seguridat pa nos mes i pa esnan ku ta dependé di nos. Hopi tempu i energia ta bai pa purba sigurá ku nos ta seif – tantu awor komo den futuro.

Nos ta buska seguridat - den relashonnan stabil, den entrada garantisá, den salu kontinuó...

Pero a lo largu nos no por kontrolá nos mes futuro. Hopi be Hesus a papia ku su siguidonan tokante e kestion di buska seguridat den poseshon material.

Ta p'esei mi ta bisa boso: no preokupá pa boso bida, esta kiko kome òf kua paña bisti. Pasobra bida ta bal muchu mas ku kuminda, i kurpa mas ku paña... Kua di boso lo por rèk su bida niun krenchi dor di preokupashon? Si boso no por hasi ni algu chikí asina, pakiko wòri pa sobrá kos?

Un otro be Hesus a konta e multitud ku poseshon material no ta dura pa semper:

"Tene kuidou i warda boso mes di tur sorto di avarisia, pasobra no ta importá kon riku un hende ta, e no tin su mes bida den su man."

E ora ei El a konta nan e siguiente parábola:

Tabatin un hòmbler riku ku kunuku ku tabata duna bon kosecha. El a pensa den su mes: Kiko mi mester hasi? Pasobra mi no sa unda mi tin ku pone mi kosecha. El a pensa: Bo sa kiko, mi ta bai laga tumba mi mangasinanan i traha otro mas grandi ainda; eiden mi por pone

mi trigo i mi otro kosnan. E ora ei mi por bisa mi mes: Mi amigu, awor aki bo tin hopi kos bon poné un banda pa hopi aña benidero. Sosegá bo kurpa numa; kome, bebe i gosa! Ma Dios a bis'é lo siguiente: Hende bobo! Awe nochi mes bo mester entrega bo bida. E ora ei, pa ken e kosnan ku bo a pone un banda, lo keda?

Hesus a terminá bisando: Asina aki ta pasa ku hende ku ta montoná rikesa, ma no ta riku den bista di Dios.

Relashonnan, entrada, salu, tur ta importante pero no ta dura pa semper. Ta haña seguridat duradero otro kaminda – serka Dios.

Den Bo, SEÑOR, mi ta buska mi refugio, no laga mi keda nunca brongosá.

Bo ta hustu, p'esei bin salba mi! Tende mi, no tarda pa libra mi, sea mi baranka di refugio, un fòrti fuerte pa duna mi skapatorio.

Pasobra den su grandesa Dios a duna nos un bida nobo dor di lanta Hesu-Kristu for di morto. Esei a yena nos ku un speransa bibu: nos ta spera di risibí e benefisionan abundante ku Dios tin warda pa boso tambe den shelu, e benefisionan duradero ku no por kaba na nada ni por dañá.

Dios a manda Hesus bin muri pa nos i resusitá atrobe pa nos por haña seguridat ku ta dura mas ku nos bida aki na mundu.

Sitanan bíbliko; saká for di BEIBEL.

1. Lukas 12:22b-23, 25-26
2. Lukas 12:15-21
3. Salmó 31:1-2
4. 1Pedro 1:3b-4



Prayer is not a "spare wheel" that you pull out when in trouble; it is a "steering wheel" that directs us in the right path throughout life..